

Ni Presidente
Thomas S. Monson



Panangtakuat Manen iti Kaipapanan ti Paskua

Tawtawen ti napalabasen idi agtutuboak pay nga elder, naawaganak a kaduak dagiti dadduma pay iti maysa nga ospital idiay Salt Lake City tapno mangipaay iti pammendision kadagiti masakit nga ubbing. Iti iseserrekmi, nadlawmi ti maysa a Krismas tri nga addaan kadagiti naraniag ken makaay-ayo a silaw ken nakitami dagiti naannad ti pannakabungonna a pakete iti babaen dagiti nairangpaya a sangana. Kalpasanna napagnaanni dagiti pasilio a yan dagiti ubbing a lallaki ken babbai—a nakabenda ti ima wenno takiagda, adda sakit dagiti dadduma pay a mabalin a saan a dagus a maagasan—a siiisemda a nangkablawa kadakami.

Maysa nga ubing a masaksakit unay ti nagsaludsod kaniak, “Ania ti naganmo?”

Imbagak ti naganko, ket indawatna, “Bendisionannak man?”

Naipaay ti pammendision, ket idi agpakadakami a pumanaw iti abay ti katrena, kinunana, “Agyamanak unay kadakayo.”

Nakaaddangkami iti sumagmamano idi nangngegko nga inyawagna, “O, Brother Monson, naimbag a Paskuam.” Kalpasanna adda dakkell nga isem a timpuar iti rupana.

Addaan dayta nga ubing a lalaki iti kaipapanan ti Paskua. Ti kaipapanan ti Paskua ket maysa a banag a sapay

koma ta adda iti puspuso ken biagtayo—saan laeng iti daytoy masinunuo a tiempo no di ketdi iti unos ti tawen.

No addaantayo iti kaipapanan ti Paskua, malaglagiptayo Isuna a ti kasangayna ket ramrambantayo iti daytoy a tiempo ti tawen: “Ta nayanak kadakayo itoy nga aldaw iti ciudad ni David ti maysa a Mangisalakan nga isu ni Cristo nga Apo” (Lucas 2:11).

Iti aldawtayo ti kaipapanan ti panangted kadagiti sagut ket dakkell ti papel nga ak-akmenna iti panangrambak iti tiempo ti Paskua. Pagsayaatantayo ngata no saludsodentayo iti bagbagitayo, Ania a sagsagut koma ti kayat ti Apo nga *itedko* Kenkuana wenno kadagiti sabali iti daytoy napateg a panawen ti tawen?

Mabalinko nga isingasing a kayat ti Nailangitan nga Amatayo nga ited koma ti tunggal maysa kadatayo Kenkuana ken iti Anakna ti sagut ti panagtulnog. Mariknak pay a kiddawenna kadatayo a tulongantayo dagiti sabali babaen ti panangusar iti sanikua ken talentotayo ken santayo nga agbalin a naimot wenno managimbubukod wenno mannakiapa, kas iti isingasing ti napateg nga Anakna iti Libro ni Mormon:

“Pudno, pudno kunak kadakayo, saanko a kukua ti addaan iti espiritu ti pannakisuppiat, ngem kukua ti sairo, nga . . . kiburena ti puso dagiti tao tapno pagpungtotenna ti tunggal maysa.

“Adtoy, saan a daytoy ti doktrinak, ti mangkibur iti puso ti tao tapno agpungtot, a maibusor iti sabali; ngem daytoy ti doktrinak, a rumbeng a maikkat dagiti kasta a banag” (3 Nephi 11:29–30).

Iti daytoy a datdatlag a dispensasion ti pakabuklan dagiti panawen, pudno a saan a limitado dagiti gundawaytayo a mangipateg ken mangted iti bagbagitayo, ngem saan a kanayon nga adda dagitoy a gundaway. Iti agdama adda dagiti puso a paragsaken, dagiti nasayaat a balikas a sawen, dagiti aramid nga aramiden, ken dagiti kararua nga isalakan.

Insurat ti maysa nga addaan iti nagagar a pannakaammo ken pannakaawat iti kaipapanan ti Paskua:

Siak ti Kaipapanan ti Paskua—

Sumrekak iti pagtaengan ti nakurapay, a mangigapu iti panagmulagat dagiti nabessag ti panagruprupana nga ubbing, gapu iti siddaaw.

Siak ti mangigapu iti panaglukay ti nairut nga ima ti managimbubukod a tao ket iti kasta maipintak iti kararuana ti maysa a naraniag a silaw.

Siak ti mangigapu iti lakay wenno baket a sumadiwa ti kinaagtutuboda ken agkatawada kas iti panagkatawada idi ubbingda pay.

Pagtalinaedek a sibibiag ti ayat iti puso ti kinaubing, ken pagraniagek ti pannaturog babaen kadagiti napipintas a dardarepdep.

Siak ti mangigapu iti nagagar a saka nga umuli a mangipaay iti tulong kadagiti agkasapulan, a mangpanaw kadagiti puspuso a masmasdaaw iti kinaimbang ti lubong.

Siak ti mangigapu iti nayaw-awan tapno mangisardeng iti apagkanito ti nagastar, nabuslon a wagasna ket mangipatulodak iti maysa a banag iti agur-uray nga ipatpateg nga aglulua gapu iti ragsak—dagiti lua a mangugas kadagiti kuretret gapu iti panagliday.

Sumrekak kadagiti nasipnget a selda ti pagbaludan, a mangipalpalagip iti namarkaan a kinalalaki ti no ania ti mabalín a mapasasamak ken mangitudtudo kadagiti napipintas nga aldaw a sumangbay.

Umayak a siinnayad iti nalanay, puraw a pagtaengan ti saem, ken dagiti bibig a nakapuy unayen a mangisao laeng a sipipigerger iti naulimek, nalawag a panagyaman.

Iti rinibu a wagas, siak ti mangigapu iti nabannogen a lubong a mangkita iti rupa ti Dios, ket iti apagkanito manglipat kadagiti banag a babassit ken nanumo. Siak ti Kaipapanan ti Paskua.¹

Matakuatan koma manen ti tunggal maysa kadayoy ti kaipapanan ti Paskua—uray ti Espiritu ni Cristo.

NAGADAWAN

1. E. C. Baird, “Christmas Spirit,” iti James S. Hewitt, ed., *Illustrations Unlimited* (1988), 81.

PANANGISURO MANIPUD ITI DAYTOY A MENSAHE

Bayat ti panangibinglayoy iti mensahe ni Presidente Monson iti pamilia, ibilangyo ti panangyunay-unay iti saludsod a dinamagna maipapan iti no ania dagiti sagut a kayatna nga itedtayo Kenkuana wenno kadagiti sabali itoy a tiempo. Allukoyenyo dagiti miembro ti pamilia a mangisurat kadagiti kapanunotan ken ideyada (wenno, para kadagiti babassit nga ubbing, pagdrowingen ida iti ladawan) maipapan iti no kasano ti “mangtakuat manen iti kaipapanan ti Paskua—uray ti Espiritu ni Cristo.”

AGTUTUBO

Ti Naan-anay a Bisperas ti Paskua

Ni Jerie S. Jacobs

I di ubingak pay, maysa kadagiti kapintasan a paset ti tunggal tawen ket ti Bisperas ti Paskua. Nagaramidkami iti pamiliak iti pítsa, napankami nagkaroling, ket kalpasanna nagtitiponkami para iti maysa a debosional iti Paskua. Nagkantakami kadagiti himno iti mapagdua-duaan nga uppat ti pasetna nga armonia ken impig-sami ti nagtokar kadagiti kanta ti Paskua nga usarmi dagiti naidumduma a sabasabali nga instrumentomi iti musika. Kanayon ng igibus ni Tatang ti rabii babaen iti kapanunotan maipapan iti Paskua a nangpalua kadakami gapu iti ragsak. Saan a naragragsak pay ti biagmi no awan ti Bisperas ti Pakua.

Idi dumakdakkelakon, rinugian ti inak nga aywanan ti ubing a kaarrubami, ni Kelly. Umay ni Kelly iti balaymi iti inaldaw kalpasan ti panageskuelana bayat ti panagtrabaho ti inana, ni Patty. Surotsurotennak ni Kelly a kasla maysa nga uken—natagari ken agkasapulan iti

panangasikaso. Kanayon a magin-awaanak no umay alaen ni Patty ti anakna a babai ket panawanda ti balayko ken familiak a sitatalna.

Maysa a Disiembre, nagamakak idi inawis ti inak da Patty ken Kelly tapno makaduami iti Bisperas ti Paskua. *Ti* Bisperas ti Paskuak. Immisem ti inak ket impanamnamana kaniak, "Awan ti balbaliwanna." Ngem ammok unay nga adda balbaliwanna. Kanendanto amin ti pitsami. Katawaanto ni Kelly ti panagkantami. Ninamnamak ken

inawatkon a daytoyto ti kalidayan a Bisperas ti Paskua.

Idi dumteng ti sardam, kinaduadakami da Patty ken Kelly, ket nagsasarita ken nagkakatawa ken nagkakan-takami. Husto ni nanangko. Daytoy *ti* karagsakan. Iti tengnga ti rabii nagyamanda kadakami ket sikekedked a nagpakadada. Napanak naturog a napnuan rag-o ti pusok. Natakataak a dagiti pudno a napapateg a sagut ti Paskua ket saan a mapukaw no maibinglay. Ngem ketdi magpasam-it ken umaduda no iparaburtayo dagitoy.



Pammati, Pamilia, Tulong

Visiting Teaching, Maysa nga Aramid ti Pannakaisalakan

Sikakararag nga adalenyo daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapgisa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

Ti visiting teaching ti mangted kadagiti babbai iti gundaway a mangaywan, mangpapgisa, ken mangisuro iti tunggal maysa— pudno a daytoy ti maysa nga aramid ti pannakaisalakan. Babaen ti visiting teaching, agserbi dagiti kakabsat a babbai a maipaay iti Mangisalakken ken tumulongda a mangisagana kadagiti babbai para kadagiti bendision ti agnanayon a biag.

“Datayo ti ‘mangballaag, mangilawlawag, mangigunamgunam, ken mangisuro, ken mangawis iti [amin] nga umasideg ken ni Cristo’ (DkK 20:59), kas iti kinuna ti Apo kadagiti paltiingna,” kinuna ni Presidente Spencer W. Kimball (1895–1985). Kinunana pay, ti pammaneknekyo ket maysa a nakaskasdaaw a wagas a panangisao iti mensahe.”¹

No datayo kas visiting teacher ket umad-adu ti ammotayo maipan kadagiti kinapudno ti ebanghelio, dagiti pammaneknektayo ti mangpapgisa ken mangtulong kadagiti kakabsat a babbai nga agsagsagana a mabuniagan ken makumpirmaan. Tulongantayo dagiti baro a miembro nga agbalin a naan-anay nga agbiag iti ebanghelio. Makatulong dagiti isasarungkar ken pammatagtagayo a “mangpasubli

kadagitay kimmayakayen [ken] mangpapgisa iti pammaneknekdagitay nagbalinen a saan nga aktibo iti ebanghelio.”² Ken allukoyentayo dagiti kakabsat a babbai nga umasideg ken ni Cristo babaen ti idadar-ay iti templo.

“Mapankayo mangisalakken kadagiti kararua,” kinuna ni Presidente Kimball kadagiti visiting teacher, “ken asino ti makaibaga nga adu kadagiti nasasayaat nga aktibo a tat-tao iti Simbaan ita ti aktibo gapu ta napankayo kadagiti pagtaenganda ket nangtedkayo iti maysa a baro a pannirigan, maysa a baro a parmata. Impakaammoyo kadakuada dagiti banag a saanda nga ammo ken maawatan. Inyatiddogyo dagiti patingga ti panagkitada. . . .

“Kitaenyo, saanyo laeng nga isalsalakan dagitoy a kakabsat a babbai, ngem nalabit nga isalsalakanyo pay dagiti assawada ken dagiti pagtaenganda.”³

Manipud kadagiti Nasantuan a Kasuratan

Doktrina ken Katulagan 20:59; 84:106; 138:56

Manipud iti Pakasaritaantayo

Idi binukel ni Propeta Joseph Smith ti Relief Society, kinunana

a dagiti babbai ket saanda laeng a mangaywan kadagiti napanglaw ngem ketdi mangisalakanda pay kadagiti kararua. Insurona pay nga addaan dagiti babbai iti Simbaan kadagiti napapateg nga akem iti plano ti Nailangitan nga Ama iti pannakaisalakan.⁴ Naiwanwan babaen dagiti pagbatayan nga insuro ni Propeta Joseph Smith, datayo kas kakabsat a babbai iti Relief Society ket makapagtitinnulongtayo a mangisagana kadagiti babbai ken dagiti familiada para kadagiti kaindaklanan a bendision ti Dios.

“Agkikinnaasitayo koma iti tunggal maysa,” kinuna ni Presidente Brigham Young (1801–77), “ket bay-antayo [dagitay]napigsa a siaayat a mangagas kadagiti nakapuy tapno mapapigsada, ken bay-antayo dagitay makakita a mangtarabay kadagiti bulsek agingga a makitada ti dalan para iti bagbagida.”⁵

DAGITI NAGADAWAN

1. Spencer W. Kimball, iti *Daughters in My Kingdom: The History and Work of Relief Society* (2011), 116.
2. Eliza R. Snow, iti *Daughters in My Kingdom*, 83.
3. Spencer W. Kimball, iti *Daughters in My Kingdom*, 117.
4. Kitaenyo ni Joseph Smith, iti *Daughters in My Kingdom*, 171–72.
5. Brigham Young, iti *Daughters in My Kingdom*, 107.

Ania ti Maaramidko?

- 1.** Kasano nga isagananak ti Relief Society para kadagiti bendision ti agnanayon a biag?
- 2.** Ania ti maaramidko tapno mapapigsa ti pammati dagiti ay-aywanak?

Para iti ad-adu pay nga impormasion, mapan iti reliefsociety.lds.org.